

nakomelinge na sineme dode eder sin capitel wel und wan se willen unde wū dicke se willen, mit alleme rechte unde nūt, alse we und use eldern dat gehat hebben. Were ok dat we des gudes wat vorleghen hedden, er we den Lowenberg verloren, weme dat geleghen were, den sculle we und willen an usen herren van Halberstad wisen eder an wen he wel eder an de, den we dat gud geleghen hedden nach uses herren hete, und de scal dat van on untfan unde wat we hebben gehat in dissen dorpen, de hir na bescreven stat, dat to der vogedie hort to dem Lowenberghe und to Quedelingeborch, to Groten Hersleve unde to Lutteken Hersleve Wylboy Tekendorp Groten Ditforde Lutten Ditforde Ballersleve Tzallersleve, aver Tzallersleve, to Orden unde echt Orden, Marsleve Nenstede Campe Mekelvelt und to Brockenstede und de vogedie over dat Westendorp, de Gropere to Quedelingeborg unde over der ebdeschen gut van Quedelingeborg, der provestinnen und over des goddeshuses gut, dat in de vogedie hort, over dat closter to sunte Wyprechte, over dat closter to Munczingeberge und gemenleken over alle dat gut dat in de voghedie hort, et si benomet eder nicht benomet unde is geschen na goddes hort dritteynhundert jar in dem en und voftegesten jare an sunte Jacobes daghe.

Original mit 7 Siegeln im Staats-Archiv zu Magdeburg s. R. Stift Halberstadt III, 10.

164. *Albrecht, Bischof von Halberstadt, verleiht mit Zustimmung seines Capitels den Bürgern von Quedlinburg wegen geleisteter Hülfe gewisse Privilegien. 1351. Juli 25.*

We Albrecht, von goddes gnaden byscop to Halberstad, bekennen openbare alle den de dissen bref seen eder horen lesen, dat we mit witscop und volbort uses capitels unse leven getruwen de borgere van Quedelingborg begnadet hebben und on erlovet hebben dorch denestes willen, dat se uns gedan hebben an deme hus to dem Lowenberge, dat se moghen besetten mit unseme richtere in der herberghe und vorebeden, an use besetene man und brodede gesinde, de scal men vor uns erst vorclaghen. Ok bekenne we, dat we on erlovet hebben, dat se wol moten ore vee driven up alle de weyde in useme gebede gelijk usen geburen umme beyde stede to Quedelingborg up ene halve mile, wanne se willen, dar scole we noch use voghede noch use bure noch nement van user weghene se an hindern: se scolen aver use bure an oreme corne noch an oreme hechgrase nictes hindern. Ok erlove we on und hebben erloft, dat se wol moten ore makeden lantwere betern, lemengraven und lantwere maken, wur und wan se willen, ok ene halve mile umme beyde stede to Quedelingborg. Were dat we vorsetten unse gerichte to Quedelingborg binnen der stad eder dar buten, weme we dat setten, de scolde se an dissen vorbenomden stucken ok nicht hindern. Dat on alle disse vorbescrevene stücke ewichliken gehalden werden, so hebbe we to ener openbaren betuginge dissen bref on geghe-